

UCAPAN PERDANA MENTERI DI MAJLIS  
PEMBUKAAN KIMA SENDIRIAN BERHAD,  
DI KAJANG, SELANGOR PADA 10<sup>HB</sup> JUN,  
1972

Y.B. Encik Ghaffar<sup>1</sup>, Y.B. Menteri-menteri, Tuan-tuan Yang  
Terutama.

Saya sungguh gembira kerana hari ini kita bersama-sama  
menyaksikan setapak lagi kemajuan dalam usaha Kerajaan  
menyusun semula masyarakat dengan membawa industri ke  
kawasan luar bandar.

Kilang kain MARA atau KIMA yang ada di depan kita ini  
adalah bukti yang nyata bahawa Kerajaan berazam hendak men-  
capai matlamat yang dicita-citakan menurut Dasar Ekonomi  
Baru.

Saya mengambil peluang ini mengucapkan tahniah dan pujian  
kepada MARA atas iniativenya menubuhkan Syarikat ini, dan  
seterusnya kepada Textile Corporation of Malaysia kerana dengan  
kerjasama yang diberikannya itu Kilang KIMA ini berjaya di-  
dirikan dan memulakan pengeluarannya hari ini.

Saudara-saudara sekalian,

Sepertimana yang diterangkan kepada kita tadi, tugas utama  
KIMA ialah sebagai pembekal kain putih atau bleached untuk  
kegunaan Pembatik-pembatik, melalui Perbadanan Pemasaran  
Batik. Selama ini kain-kain putih itu diimpot dari negeri-negeri  
luar iaitu Jepun dan Pakistan. Oleh itu dengan mula berjalannya  
perusahaan ini, kita tidak perlu lagi mengimpot kain siap tetapi  
kapas untuk benang saja, dan dengan demikian menjimatkan  
foreign exchange.

Inilah munafaat yang nyata dari perusahaan ini selain dari  
peluang pekerjaan kepada hampir-hampir 600 orang pekerja buat  
masa ini. Saya faham angka ini akan meningkat 1,000 orang apa-  
bila full production kelak.

---

<sup>1</sup> Y.B. Menteri Pembangunan Negara dan Luar Bandar

Sebagai sebuah industri yang moden, peluang pekerjaan yang diberikan itu amat besar maknanya dalam bidang memberi latihan teknik dan kemahiran untuk membentuk masyarakat perindustrian atau industrial community menggantikan masyarakat tani.

Sejarah negara-negara yang maju seperti United Kingdom memberikan contoh yang nyata kepada kita tentang peranan masyarakat Lancashire Cotton Mills mempelupuri perubahan sosial yang dikenal dengan Industrial Revolution pada abad ke lapan belas dulu. Negara kita hari ini menghendaki perubahan-perubahan yang fundamental kalau orang-orang kita hendak maju setanding dengan negara-negara yang moden di dunia.

Pada hemat saya, cita-cita ini tetap akan tercapai apabila kita berjaya menurunkan 80% orang-orang kita dalam traditional rural sector kepada angka yang lebih wajar, dengan menaikkan kadar dalam modern industrial sector. Inilah objective kita mengenai penyusunan semula masyarakat yang saya harap dapat dilaksanakan dalam tempoh yang seberapa singkat.

Saudara-saudara sekalian,

Kerajaan sedang menjalankan segala upaya bukan saja untuk meluaskan bidang perindustrian ini tetapi di samping itu menjamin keadaan bekerja yang lebih baik bagi kaum buruh. Baru-baru ini saya telah melancarkan Social Security Scheme yang boleh disifatkan sebagai payong kepada kaum pekerja amnya kerana melalui Sekim ini pekerja-pekerja yang cacat cedera semasa bertugas akan mendapat bantuan wang di samping rawatan percuma. Rancangan EPF memang sudah berjalan lama dan melalui usaha-usaha Kesatuan Sekerja, saya faham pekerja-pekerja berjaya mendapatkan kemudahan-kemudahan dan munafaat lain.

Akan tetapi, saya harap kaum pekerja janganlah menganggap segala kemudahan ini satu hak mutlak mereka tanpa menghendaki tanggungjawab dipihak mereka pula. Sebagaimana kaum majikan dikenakan tanggungjawab tertentu, begitu pula kaum pekerja hendaklah menunaikan kewajipan yang ditentukan untuk mereka. Di samping memberikan perkhidmatan yang baik dan menjaga disiplin kerja, mereka sepatutnya berhati-hati membuat satu-satu tuntutan dalam context keperluan masyarakat dan negara.

Kita hendaklah memandang jauh kedepan dan tidak semata-mata mengikut cara hidup yang kurang berdisiplin. Umpamanya, baru-baru ini ada timbul bantahan setengah-setengah pekerja mengenai kerja malam atau night-shift yang dianggap oleh setengah-setengah tidak wajar bagi kaum wanita Malaysia. Sifat seperti ini tidak akan membawa kita ke arah kemajuan apa lagi kalau dilihat dalam perkhidmatan-perkhidmatan lain seperti jururawat di hospital-hospital dikehendaki bertugas pada sebelah malam.

Saya seringkali menegaskan iaitu kalau orang-orang kita hendak saing bersaing dengan orang-orang lain, mustahaklah kita mengubah sikap dan menyesuaikan diri dengan kehendak-kehendak zaman moden ini. Kepada pekerja-pekerja di sini khasnya, saya suka mengingatkan mereka supaya menjalankan kerja masing-masing dengan tekun dan cermat, sambil meninggikan mutu pekerjaan mereka untuk mencapai kadar productivity yang lebih tinggi.

Pekerja-pekerja hendaklah berusaha mencari kemahiran terutama dalam indastri seperti KIMA ini yang banyak membuka peluang-peluang bagi pekerja-pekerja meningkatkan daya kemahiran dalam satu-satu lapangan. Dengan cara mengembangkan kemahiran ini turun-temurun, tidak syak lagi akan terbentuk industrial community yang cekap dan bersikap progressive di kalangan orang-orang kita.

Saudara-saudara sekalian,

Menurut rencana, Kilang KIMA ini kelak akan meluaskan pengeluarannya kepada kain-kain yang bermutu termasuk printed cotton dan juga polyester/cotton material. Jadi, selain dari memenuhi keperluan negara, kilang ini mempunyai export potential yang cerah. Saya percaya orang-orang kita tentu merasa megah dengan menggunakan kain-kain tenunan negara sendiri dan tidak menjulang kain buatan luar negeri.

Hari ini textile indastri semakin luas dan kilang-kilang makin bertambah. Ini saya rasa membuka kemungkinan bagi menjalankan usaha menanam kapas sebagai salah satu langkah agricultural diversification. Negara-negara jiran kita seperti Indonesia dan Thailand ada menjalankan penanaman kapas. Oleh itu saya suka mengarahkan MARDI membuat penyiasatan supaya usaha menanam kapas ini, kalau didapati sesuai, boleh dibuat secara besar-besaran untuk menambah sumber-sumber pengeluaran.

Saudara-saudara sekalian,

Sebelum mengakhiri ucapan ini, saya ingin mengucapkan ber-banyak-banyak terimakasih kepada Y.B. Encik Ghaffar dan juga Y.B. Dato Mustapha Jabar atas jemputan kepada saya dan isteri saya petang ini. Saya ingin juga mengucapkan terimakasih kepada kakitangan dan pekerja-pekerja KIMA yang telah berpenat lelah mengaturkan upacara petang ini dan sudah sepatutnya pula mereka berbangga kerana bersama-sama meraikan hari yang bersempena ini.

Dengan itu, saya sukacita merasmikan pembukaan Kilang KIMA ini dan berdoa semoga usaha ini akan mencapai sepenuh-penuh kejayaan.